



浙軍記

知 8
2.270
5



明 2270 卷 5



湘軍記卷十二

援廣閩篇

東湖王定安撰

洪楊之亂起廣西終廣東當其勢盛則由偏陬擾腹地據
吳楚上腴恣其貪饕之性飽掠名城宜若可以橫行無忌
及夫勢孤援絕大軍迫其前降眾訶其內則又由腹地竄
偏陬躋巖涉澗苟延須臾之命故觀地形之險夷而賊勢
之興衰昭然矣自蘇常金陵相繼告克蘇浙諸酋倉皇挺
走率道皖南入江西追師躡之不能息喙乃相率入福建

湘軍記

福建者古閩粵地窮山巨海號爲瘠區賊避大軍走叢薄冀憑險阻自固而勢已不能復振遂至於亡故廣閩者粵賊之所始終而湘軍之興江忠源肇端於桂林越十餘載左宗棠乃葳功於嘉應得失倚伏之機其中若有天焉初道光三十年廣西寇發廣東羣盜亦起湖南以鎮筸兵二千從兩廣總督討之咸豐三年洪秀全踞金陵兩廣土匪遙借江南寇勢相煽誘草竊滋益多其年四月廣東陽山土匪犯湖南宜章五月廣西興安恭城土匪復陷其縣城犯永明七月廣東樂昌土匪犯興甯是時湘軍初起輒遣

將擊走之四年湘軍出岳州援湖北留王鑫軍防湖南南界廣西灌陽賀縣土匪充斥廣東紅巾匪自韶連達廣州勢張甚然不敢度嶺而北五年廣東軍擊紅巾匪敗之匪北趨郴桂旁及永州知府黃文琛扼險以待寇匪圍富川知縣濟昌城守旣陷朝服坐堂皇罵賊死而桂陽鄉軍起王鑫往來游擊匪至輒破散七年正月廣西叛將黃金亮合興安靈川土匪攻柳州二月陷之桂林土匪蠡起北掠至全州知府蘇鳳文告急湖南巡撫駱秉章始議援廣西廣西地遠而貧諸將不願往蔣益澧自請行乃檄益澧募

千五百人以段瑩器千人江忠濬千二百人隸之五月至
全州三戰皆捷匪不虞湘軍能戰相愕還興安益澧圍之
七月克興安餘匪復糾靈川平樂諸盜據府城秉章增遣
黃輔鼎蕭榮芳將八百人出恭城與益澧會師九月自恭
城出平樂匪倚戰艦依水通糧益澧破其城外二壘燒寇
舟與江忠濬南北夾擊匪收入城益澧薄城而軍黃輔鼎
彭玉山恃勇先登中礮死官軍乘之十一月壬戌克平樂
當是時慶遠柳潯梧州諸盜各自爲部不相援應匪勢浸
衰益澧以輕軍克大郡遂以能戰知名巡撫勞崇光奏留

廣西督軍駱秉章月助益澧餉銀二萬增造礮船六十餘
募水師益其軍

八年勞崇光徵江忠濬入屯桂林先是州郡姦民反側官
不能盡捕治則假招撫羈縻之姦民亦假官令脅良懦兵
賊相淆雜崇光尤喜用降人令其酋白彪率悍黨二千屯
省城掠民子女財帛勻分之冤憤無所訴一日降人擁至
巡撫署持兵叫喚崇光出坐堂皇其黨直奔公座矛加巡
撫冠崇光笑而指其吭曰誤矣若欲殺而翁刺此乃可耳
其弁乃翼崇光退當是時院司寄危城中號令聽之盜魁

崇光乃密召江忠濬入省圖之。忠濬以書示蔣益澧。益澧曰：「彼黨甚眾，君去姑慎之，待吾至乃發耳。」比忠濬入省城，謁巡撫。巡撫乃託他故召降酋，降酋悉至。忠濬閉轅門，駢誅之。悉案捕諸桀黠者，易置守軍，然後巡撫號令得下行。官民始安枕。崇光奏以蔣益澧署按察使，益委任之。益澧以次討平潯、梧、慶、遠盜。府縣官始治民事，徵租稅如平時。其年三月，僞翼王石達開自江西竄浙江。四月，入福建，陷政和，遂陷邵武，踞浦城，掠建甯。閩浙總督王懿德巡撫慶端遣軍禦之，皆不及。五月，蔣益澧克柳州，黃金亮走古州。

六月，閩賊陷松溪、崇安、建陽，圍建甯。浙江巡撫晏端書遣饒廷選、張騰蛟移衢處兵往援。別將出龍泉援浦城。慶端駐軍延平。七月。

詔侍郎曾國藩以援浙之師，援閩未至，而閩軍已頻復政和、光澤、建陽、松溪、甯化。浙軍克浦城、崇安。八月，閩軍克邵武。曾國藩至江西河口鎮。石達開分黨陷安仁、新城。劉長佑敗之。新城賊還走閩境。九月，國藩至建昌，令諸軍分道入閩。張運蘭由杉關進攻順昌，將樂、蕭啟江由廣昌進攻汀州、甯化。吳國佐防南豐、廣昌、石城。時賊勢趨重汀州，而

石城千刀會匪踞回龍砦國藩建議先清江西再規汀甯奏言江閩交界中隔大嶺北至仙霞南至武平一嶺縣互殆逾千里大關小隘處處可通現派張運蘭由北度嶺蕭啟江由南度嶺中間泰甯南豐等處尙屬空虛二年以來賊跡往返蹂躪嶺內如建昌各屬嶺外如邵汀各屬井邑蕭條百物蕩盡今歲疾疫盛行居民鮮少閩中田荒米貴油鹽無從購買且無現錢可換臣駐紮建昌一面防中路回竄之賊一面轉運錢米解赴蕭張兩處臣距蕭啟江四百餘里距張運蘭三百餘里而蕭張相距亦在五百里外

俟攻克順昌將樂歸併汀州一路臣亦率隊繼進庶無此剿彼竄之虞十月閩賊還走江西汀州甯化順昌將樂皆復賊由瑞金掠信豐南安窺贛州陷景德鎮國藩乃檄蕭啟江攻信豐南安張運蘭赴景德禦之是月李續賓戰歿三河官文駱秉章奏國藩移師援皖王懿德則請國藩緩發且留張運蘭一軍衛閩境詔國藩酌緩急行

九年正月閩軍克連城龍巖福建解嚴三月石達開自江西竄湖南圍永州劉長佑擊走之四月達開犯寶慶前隊

掠全州。蔣益澧屯柳州，捕旁邑盜。巡撫檄令回援省城。六月，石達開圍寶慶。蔣益澧還桂林，勞崇光擢兩廣總督。曹澍鍾爲廣西巡撫。蔣益澧代爲布政使。李續宜、劉長佑、劉嶽昭、田興恕合擊賊於寶慶，大破之。石達開謀竄黔蜀，其黨多廣西人，思還鄉里。七月，達開由新甯城步山徑，開關趨廣西，而永明土匪出恭城應之。蔣益澧出屯平樂，賊已大至，傾城守嚴，北走灌陽。合石黨掠興安，犯桂林。初至，才三千餘人，三日內，眾至數萬。省城久無寇警，至是大駭。巡撫急召益澧全軍回守。益澧兵雖號五千，餉久乏，空缺者

未補。前在賀縣，頗損士卒。又分防柳州，所部入省者僅千餘人。軍少而疲，自謂可無恐。學政李載熙與論兵事，不合。以侵餉玩寇劾之。

詔降益澧道員曹澍鍾，乞援湖南。

文宗乃促駱秉章分兵赴急。時劉長佑新援寶慶有功，曾國藩遣援湖南之蕭啟江已至。秉章乃令二人者往。長佑軍次東安，士多道病。八月，啟江先行，至興安。石達開已西過義甯，侵黔邊。灌陽匪亦連營靈川，欲俱西。聞援軍至，列陣大榕江，以遏追師。啟江進擊之，甫交綏，賊卽潰。益澧部

將蕭榮芳亦自柳州來與啟江軍俱會省城九月庚午啟江破賊於南門文昌閣益澧水陸會擊復大破之丙子賊併走義甯桂林解圍丙戌陷慶遠踞之分黨由富川掠連山廳廣東軍擊敗之餘賊走湖南

詔授劉長佑廣西按察使督湘軍長佑將八千人自永福西進賊扼柳城西連羅城天河南引慶遠分趨柳州復東犯昭平賀縣蕭啟江初調赴皖復改防蜀已率師北行劉長佑乃攻柳州

十年正月劉長佑克柳州民團復柳城

詔擢長佑布政使賊復自湖南藍山桂陽侵廣東邊掠樂昌仁化南雄輒爲粵軍所敗乃陷清遠入英德陽山於是增蔣益澧軍至五千屯陽朔以東規平樂廣東援軍進梧州賊悉西趨而賀縣淪陷已二載官軍未遑問復奏調湘軍將劉嶽昭自江華進攻三月至富川克其城嶽昭乃由富川西禦昭平援賊於春頭源敗之賊悉保賀縣四月蔣益澧自平樂來會師賊多降益澧攻慶遠擊賊畫眉嶺斬馘二千餘禽數百人平樂昭平皆定進攻思恩河池復大破之己未慶遠賊棄城遁益澧遂復慶遠廣東軍亦敗賊

清遠石達開分黨入貴州巡撫曹澍鍾母喪奪情督四川軍防達開劉長佑爲廣西巡撫蔣益澧爲按察使當是時土匪陳戊養據太坪陳開黃鼎鳳據潯州范亞音據容縣張高友陳金剛據平樂其他慶太思南泗鎮諸屬大股數千人少或數百人倏兵倏賊不可究詰長佑起儒生稍以吏治整飭州縣遣湖南廣東水勇造戰艦扒船上下遊擊廣西水師自此大備五月蔣益澧擊破陳金剛於平樂進圍賀縣會知府劉嶽昭克之士酋陳保犯雒容長佑遣李明惠擊殺之而石達開踞慶遠賴裕新犯思恩武緣河池

輒爲民團所敗乃遣黨分數道窺黔楚其左旗後旗眾猶四五萬七月左旗出靈川犯桂林長佑調鄔世堂回守省城候卒頗言賊黨攜貳思東歸長佑張諭招撫其酋張志功等乞款留三千人畀志功自效餘悉資遣之而後旗復爲李明惠所破奔義甯長佑遣鄔世堂躡之道州賊喪亡略盡時石賴兩酋猶擁眾數萬據武緣掠遷江南甯左江道吳德徵等擊破之斬馘萬計賊走忻城掠興業陷北流土匪吳凌雲陷太平殺知府劉作肅而陳戊養據太坪塞我南道柳州軍不克進乃以劉坤一總統楚軍擊陳戊養

於太坪分兵渡河攻忻城九月達開復犯南甯武緣掠賓州上林宣化土匪李青璇犯永淳吳德徵等擊走之忻城遷江賊掠來賓馬平宜山天河融江入永甯劉坤一李明惠躡之賊陷綏甯城步湖南復擾十月劉長佑督軍全州遣將扼賊於武岡新甯間屢破之賊走東安道州零陵長佑還桂林增遣李士恩等助攻太坪以張志功所部赴梧州會廣東軍攻下郢破走之蔣軍復敗之竹洞英洞賊奔潯州十一月劉坤一進攻柳城四十八弄羣盜皆降陳戊養亦乞撫於是柳城皆定石黨竄貴州獨山走融縣入湖

南十二月閩賊陷汀州

十一年正月劉坤一北躡石黨灌陽會湖南軍夾擊破之石黨復自貴州定番還犯慶遠南丹三月艇匪犯象州坤一還擊於馬皮墟三戰皆捷四月閩軍將會玉明克汀州五月蔣益澧攻潯州別將擊破定番賊於灌陽賊酋余明善率萬人歸誠於是羣賊剗除略盡石酋崎嶇奔命不復振矣六月官軍克賓州七月克平南石酋益踉蹌西走銳意犯黔蜀於是貴縣橫州宣化土酋皆反正九月石酋閒道趨懷遠劉坤一遮擊於楚邊江忠義自武岡出要之賊

乃走黔陽道沅州趨浦市而東長佑檄坤一疾行趨沅州會楚黔軍躡擊之十一月蔣益澧破土匪於貴縣藍田賊或降或遁

同治元年正月長佑遣軍復羅白土縣二月復太平府時浙江事亟曾國藩左宗棠奏調蔣益澧赴援

詔擢益澧浙江布政使將八千人以往劉坤一授廣東按察使促赴任楚軍無宿將長佑乃自將討賊遣副將鄭金華屯潯州右江道蔣澤春水師繼之道員易元泰屯蓮塘四月長佑師次平樂距元泰營百里適天雨霧長佑輕騎

從百人走山徑六七十里窈冥不見人既至元泰等皆驚喜士氣自倍遂破賊馬嶺毀其木城五月長佑進潯州土匪數萬壁城外掘長濠拒我長佑分軍扼鳳凰山洋江橋以水師巡守南北江六月黃鼎鳳自貴縣來援偏師襲鳳凰山後長佑親督諸軍擊走之艇匪入東津水師自官江橫鐵鎖拒之七月戴盛寬等破賊平田嶺燬十餘壘賊分走覃塘龍山我軍進徧貴縣之大墟且勦且撫賊黨多散降益澧之援浙自至廣東請餉於總督勞崇光念其前勞資給數十萬其度嶺軍容甚盛益澧懲前失乃折節下士

爲時所稱左宗棠竟倚以平兩浙九月劉長佑擢兩廣總督劉坤一爲廣西布政使接統楚軍

二年陳金剛踞高州粵東將卓興久攻不下三月署兩廣總督晏端書咨江忠義赴援忠義前軍已抵桂林曾國藩復檄忠義援皖四月忠義改由衡州赴之八月李復猷自黔入楚眾猶三四萬犯龍勝廳九月折北走城步另股由斗江入懷遠巡撫張凱嵩檄蕭榮芳禦之九月犯富川賀縣前鋒入廣東開建廣東軍聚屯肇慶高州總督毛鴻賓復調湖南軍橫出連山扼賊東逸復猷另黨踞懷集之石

瑩坑尾樹柵屯糧爲持久計其地偏廣東陽山鴻賓調張運蘭屯連州備之開建賊折走蒼梧入懷集署懷集知縣况逢春率兵團躡之復走廣東連山掠陽山况逢春使使招降李復猷遣其弟李復忠來營議款意遲疑未決其黨已多解散况逢春急攻之乃走開泰繞至貴州永從十月張運蘭至連州之寨岡石瑩賊畏懼乞撫誅其酋向日鼎等三十餘人收降眾三千餘人遣散之俘李復猷於鐵坑檻送廣州梟誅

三年二月蔣益澧克杭州三月偽聽王陳炳文偽康王汪

海洋走江西。侵閩邊。於是光澤建甯甯化皆大擾。五月。左宗棠檄康國器趨邵武。張運蘭趨汀州以援閩。六月。曾國荃克金陵。僞幼主洪福瑱走廣德。其時金陵賊供福瑱已死。曾國藩據以入告。宗棠上疏頗譏切之。七月。官軍克湖州。僞佑王李遠繼挾福瑱走江西。諸帥復言浙江縱賊。頗侵宗棠。宗棠疏報逸賊僅數千。江西則奏逋寇精悍過十萬。賊在江西不得逞。分走廣東福建。九月。洪福瑱道瀘溪入雲際關。竄光澤。魏喻義要擊敗之。福瑱走石城。而李世賢汪海洋出入江廣邊。所部尙眾。丁太陽踞瑞金。張運蘭

等擊走之。餘賊竄平遠鎮平。掠大埔。折而西北。陷武平。張運蘭軍下壩。未戰。賊襲永定。陷之。開道抄運蘭後。運蘭方食。聞賊至。遽起索馬。遇賊營門。擁至永定城。與總兵賀國琛以下二十人皆遇害。龍巖南靖俱陷。壬子。陷漳州。福建巡撫徐宗幹移泉廈。諸軍防興泉。宗棠急檄黃少春劉明燈率四千五百人由衢州趨延平。爲中路軍。劉典將新軍八千人。自建昌趨汀州。王德榜率二千五百人繼之。爲西路軍。高連陞率四千五百人。自甯波泛海趨福州。出興泉。爲東路軍。十一月庚子。福建提督林文察攻漳州。敗死。曾

王明水師亦多傷亡其時高連陞已由福州至泉州劉典黃少春王德榜先後至閩甲子宗棠自駐延平督師十二月康國器軍規龍巖丁太陽由永定出漳平之永福里撲縣城陳允彩軍潰遂圍漳平劉典自連城東援新軍輕進大敗副將盧華勝等皆死典還保連城王德榜王開琳自汀州赴援德榜攻莒溪劉典攻朋口俱克之護浙江巡撫蔣益澧遣劉清亮率三千人屯浦城聽宗棠調遣當是時羣賊萃閩中李世賢踞漳州偽來王奏王踞龍巖永定南靖雲霄汪海洋踞長汀連城上杭之交地曰南陽鄉丁太

陽林正揚則出沒漳龍眾號二十萬而粵東之潮嘉閩之泉漳汀龍永春夙稱盜藪從亂者日眾宗棠所部才三萬與賊相持頗以餉絀兵單為虞奏言漳州城外數十里地勢平行彌望蔗田難以進攻自林文察敗歿後附近村莊多被賊脅必先將村莊撫定乃免內患現檄高連陞黃少春勿攻城浪戰相機圖之如能誘敵撲壘反客為主痛剿數次然後機有可乘剿辦流賊貴取遠勢驅各處股匪歸併一處然後合力蹙之庶完善之區得以保全而兵力亦敷分布臣未敢急目前之效貽悞大局也丙戌賊陷長泰

黃少春高連陞會復之辛卯復敗賊浦南壬辰劉典王德榜敗賊古田克其二卡癸巳王開琳張恆祥敗賊涂坊是月兩廣總督毛鴻賓遣何雲章攻雲霄楊清臣攻平和方耀攻永定丙申方耀會知縣張元楷克永定

四年正月丁巳李世賢陷漳浦庚申康國器克龍巖辛酉王德榜破古田賊壘癸亥劉典王德榜進攻南陽鄉汪海洋迎戰於馬洋洞我軍少卻退守新泉賊躡至劉典分軍禦之海洋自率黃白號衣悍黨二萬列田壠我軍兩旁抄襲典領親兵鏖戰德榜助之賊晷水走西岸多溺死德榜

追至下車汪海洋下馬痛哭倉卒閒幾爲官軍所獲其黨擁之越山而逸黃白號衣者海洋所養死士平昔遇之厚遇危急則磨之前自號無敵至是精銳喪失過半矣劉明珍敗賊於漳平乙丑高連陞敗賊於漳州好景山丙寅會王明師潰丹洲高連陞馳救賊乃走二月汪海洋棄南陽趨永定劉典追之上杭舊縣賊走白沙劉典親擊敗之乃由坎市竄龜陽劉明珍趙均會攻漳平連破坂橋後壩和溪水湖賊壘賊自石碣窺粵邊方耀擊破之悉毀石碣賊巢而另股由大埔之白埃撲楓朗營廣東軍復擊卻之賊

奔平和江蘇將郭松林楊鼎勛浮海至閩先是

穆宗以江蘇平諭李鴻章分兵援閩鴻章乃令松林率楚勇七營鼎勛率淮勇六營乘輪船出廈門仍勻蘇餉濟軍朝廷慮蘇滬距閩遠

詔閩粵督撫代籌餉事松林等既至會圍漳州鮑超前軍將婁雲慶自瑞金入武平三月辛丑賊陷詔安劉典敗賊於龍巖之奎洋山壬子高連陞黃少春會蘇軍擊賊赤嶺敗之自賊入詔安饒平大埔逼近賊氛兩廣總督瑞齡廣東巡撫郭嵩燾遣將防邊追賊至詔安城殺數千人李福

泰等分守柏松關風朗老虎關粵防稍固四月李世賢由漳北閒趨安溪王德榜邀擊敗之郭松林等擊同安土匪殲之初高連陞黃少春等攻漳州久不克見烏頭門與東北樓內相犄角乃議先攻烏頭門乙酉黃少春劉清亮攻中路王德榜攻烏頭門右高連陞攻烏頭門左郭松林楊鼎勛率洋鎗隊同出左路攻兩時拔花椿木城殆盡克其壘十四會風雨大作蘇軍發洋鎗民團大呼助勢殺聲震山谷東風愈烈各壘皆被燒高連陞奪門而入李世賢巷戰逾時開西門遁遂克漳州丙戌劉典克南靖宗棠奏言

自賊由江粵闌入閩省連陷龍巖漳州各城而漳州尤屬
腹地又菁華聚積之區一經竊據全局爲之震動高連陞
黃少春等馳抵漳州東北劉典等復回汀連節節掃盪局
勢漸臻穩固侍逆於破城之先十日致書汪逆猶思合力
突竄龍巖漳平以覓生路怪汪逆不急援之不知汪逆則
已爲西路官軍擊敗先向大埔一路竄逸矣漳城逆勢已
孤猶恃南靖及烏頭門樓內寨與東關各賊壘勉相撐格
迨官軍掃盪各壘始獲克此堅城諸將士勞烈備臻實有
未可掩抑者臣前駐延平深慮主客各軍統將頗多事權

未一此次諸將和衷共濟遇事謀定而戰略無參差卽西
路諸軍遙成犄角亦莫不如期應念而至故事機順利得
免延曠之虞實非臣始願所及現在蘇軍由漳州進攻漳
浦可由此以達雲霄詔安與粵東黃岡守軍聯絡並可杜
其入海之謀湘軍分由南靖漳州追賊以向平和可與粵
東饒平守軍聯絡其緊連粵東大埔一帶則總兵王開琳
延建邵道康國器及都司關鎮邦各軍扼永定之撫溪及
雲霄上杭一帶截之由汀州至潮州一水可通溪溜湍急
粵軍若能憑河遏截則侍康兩逆圖竄亦難己丑汪海洋

犯湖雷。康國器擊卻之。辛卯。郭松林克漳浦雲霄。高連陞克平和。次日追賊至大溪。收降眾數千。王德榜追賊至大埔。僞天將郭揚維率四千人降。五月乙未朔。郭松林克詔安。丙申。康熊飛王開琳擊賊劍灘。收降眾千人。丁酉。劉典軍擊破李世賢於永安。張福齊收降眾萬人。王開琳收降眾二萬四千人。丁未。賊酋丁太陽詣劉典降。壬子。郭松林擊雲霄岳坑匪巢。平之。甲寅。高連陞敗賊武平。汪海洋入廣東境。福建肅清。丙辰。汪海洋破粵軍於鎮平。閩五月戊辰。瑞齡郭嵩燾遣軍攻鎮平。敗賊於五星橋。方耀敗賊於

平遠。癸未。汪海洋犯嘉應州。康國器敗之於瓦窰。賊還走鎮平。先是四月閒。鮑超假還夔州。所部霆軍行次湖北金口。聞超將移師征隴。軍大譁。潰卒道江西入湖南。復由江西入廣東。與汪海洋合。於是賊燄復張。海洋訶江廣邊防。嚴欲仍由閩邊走江西。遂自鎮平逾分水坳。至廣福鄉刈早稻充食。高連陞等擊走之。自李世賢永定之敗。不知所之。汪海洋歸咎於僞王宗李元茂。元茂世賢死黨也。海洋殺之以立威。羣賊益攜貳。六月。僞陪王譚富偽朝將莫恩詣皆歸誠。海洋乃增卡稽察。以親信守之。而令霆營叛卒

分踞鎮平西南深溝高壘以自固賊勢益孤七月汪海洋
殺李世賢於鎮平初世賢自永定河晝水夜渡從者多溺
死世賢割鬚髮潛匿山中晝伏宵行至鎮平使人告海洋
海洋郊迎入城其舊黨泣訴海洋猜恨狀世賢以李元茂
之死意殊不平海洋不自安乘其卧刺殺之並殺其黨魁
五人時賊糧久匱寔營叛卒與賊爭糧相殺叛卒降於粵
軍方耀眾猶七千八月壬寅康國器克鎮平汪海洋走平
遠江西軍席寶田截之東石黃少春躡之東桃鄉賊折回
大柘趨興甯之黃陂墟羅浮司復北走長甯境席寶田婁

雲慶由平遠還長甯王開琳等分扼長甯之篁鄉鷺公墟
宗棠進駐大埔賊前後爲官軍所迫乃閒道入龍南高連
陞等追賊六晝夜中伏大敗九月汪海洋犯定南賊益趨
江西同知王大枚擊走之乃還走龍南知縣王家傑復擊
退之席寶田先至贛南扼鐵石口與賊戰累日矛傷海洋
背幾被擒前後殲賊萬人海洋復由江西走廣東陷平和
復棄平和走連平掠長甯大蓆翁源以官軍扼各隘乃由
連平越山竄平和興甯過城邑輒繞道疾趨旬日間走數
百里十月壬子突犯嘉應州陷之高連陞等還軍赴救皆

湘軍言 卷十一
不及而東江土匪充斥。遇楚軍隊伍輜重落後者，輒劫殺之。高連陞劉清亮軍苦疾疫，諸軍皆爲賊隔。宗棠急召賴長等扼永定。王德榜自汀州進攻，黃少春自信豐扼武平。促鮑超率軍入閩，自率親兵屯瑄溪，以扼漳州門戶。當是時，宗棠所部王德榜屯塔子壩，黃少春屯曹塘，高連陞屯黃竹洋，康國器屯烏泥坪，劉典屯葵嶺，環嘉應州東南。鮑超屯平成鋪，當嘉應州西面。粵軍李福泰屯藍口，曾敏行鄭紹忠屯長沙墟，方耀屯益口洋，當其西北。嘉應州城環水，其南曰河南，爲賊營。又南曰小密，曰芹菜洋，獨闕其南。

一面無一營駐紮。汪海洋傾巢出戰，官軍失利。知縣汪遇元等十一人戰歿。宗棠飛檄朱明亮扼三河壩。三河者，大小靖溪及雁石溪所匯也。其地崇山絕澗，爲潮州要衝。賊見官軍環逼，謀於州東佛子高分水鄉曹塘，設伏以待。癸卯，賊悉銳出佛子高黃竹洋，旌旗遍山野。另股由曹塘抄橫徑深坑，攻王德榜黃少春營，復襲劉典等軍於葵嶺。官軍戰少卻，賊長驅追之。眾皆懼，或曰：「兵法趣利者蹶，此成禽也。」賊不西走贛桂，而欺侮閩廣諸軍，必汪海洋之謀。宜選火鎗視寇帥龍旂擊之，餘皆憑壘自固，但殛其酋，破之。

必矣。及賊前隊大進，火鎗環集，賊不得前，引而反走。諸軍喜曰：賊易與耳。今敗矣，乘之，果大奔。汪海洋中礮死，自洪福瑱就誅。李世賢汪海洋崎嶇閩嶠，海洋驍銳，殆冠其曹。世賢狡悍，亞之比於諸賊，獨爲後亡。然世賢海洋不死，賊未可驟滅也。海洋旣殲，其黨復推僞偕王譚體元主賊事。是時賊眾猶二十萬，踞嘉應州城，與官軍相持。郭嵩燾屢函商宗棠，令劉典由蔡嶺移駐小密，粵軍鄭紹忠移駐芹菜洋，則嘉應州之圍合，可聚而殲也。諸軍遲延不進，曾敏行憤曰：吾軍少不足當大敵，請進至七墟，以待諸軍。甫至

紫營未定，而賊分軍猛撲，搏戰竟夕，則已悉眾出小密，趨黃沙嶂。環城諸軍無知者，蓋七墟近距小密，賊偵知諸軍之圍將合，因以一軍綴之，而自河南竄出，以圖復振。婁雲慶用夜半入城，城虛無人，諸軍始知賊已逸竄，而黃沙嶂萬山叢集，賊已膽落，不知所向。鮑超等軍追至，賊皆投械，跪請降。降者十餘萬人，拔良民男女萬餘人。於是粵匪悉平。自道光三十年洪楊倡亂，訖同治四年十二月始滅，凡僭亂十有六年。

王定安曰：廣閩風氣犷悍，地險多盜，平時帆船往來，率載

巨礮以行其輕死樂禍習俗使之然耶自來姦人竊據號稱侯王者雖數短運促亦必假仁義設官守治獄納賦塗飾蚩氓耳目未有愚頑凶暴荒誕無紀如洪酋之甚者也自初起訖於亡所陷郡縣多矣文無守令之司武無上下之等日以焚掠擄殺威劫良懦其梟黠者則率之習戰陣當前敵其後稍稍設鄉官名爲治民反魚肉之民之子遺者鮮矣然賊之昏亂如此猶必歷十餘載而後滅者何哉蓋以承平久文吏習於嫵熟容悅畏事諉過以趨利避處分爲高武弁則講威儀畏勤苦勇於私鬪而怯於公戰如

病者然釀毒旣久外邪從而侵之遂至深不可拔由斯言之非賊之能後亡母乃有以長養而蘊育之者歟曾胡左曾諸公知其然舉積年鉅弊廓而清之遂以翊贊中興康濟斯世其得失豈不昭然如揭哉昔民謠有曰長髮惡逢僧滅世或以蒙古親王僧格林沁當之其後乃知僧者曾人也嗚呼豈非天哉豈非天哉

湘軍記卷十二

武昌范德培校字

湘軍記卷十三

東湖王定安撰

援川陝篇

國家建行省十有八。獨四川幅員甲天下。其地沃則產物多。其民眾則選徒易。古稱秦為陸海。然郊野之富。猶云近蜀。則蜀之饒溢可知也。寇興幾十載。四川猶未被兵。帥斯土者。據完富之形。憑上游之勢。苟用蜀財養蜀士。權鹽藥之贏。以為餉。練印燹之豪。以為兵。伐梁益之木。以造戈船。馴川滇之馬。以突行陣。順流東指。以撻荆楚。平吳會。恢恢

乎游刃而有餘矣。豈僅憑川阻峽，設險自守，區區固吾圉之爲哉。然承平久，官吏狃宴安，不修武備，幸其地偏民懦，財足自贍，苟免於寇斯已矣。而川軍調援他省者，率騷擾失軍律，先後遣歸伍，兵益眚窳，不復振。及藍李禍發，標兵孱弱，不能治，乃乞援湖南。石達開乘之，全蜀糜爛無甯土矣。

朝廷憂西陲。

特命駱秉章建節入蜀，秉章習楚將，量其技能而驅策之。未三載，羣盜芟夷殆盡。其後北逐陝寇，南靖滇亂，兵餉率

自蜀出，然則賢者之有益人國，其效豈不彰彰可睹哉。初，鴉粟禁開，雲南鴉片尤勝他產，姦民越關漏稅，輒糾數十百人，間行達闔市，遇兵役則私賂以免。於是雜職未弁，倚爲利藪。藍大順、李短搭者，居雲南昭通邊，以梟黠爲私販魁，日率其徒爲姦利，往來敘州。然孳孳逐什一，罔利自肥，未嘗叛也。咸豐九年，老鴉灘私販有訟事，汛官索賂，已得金矣，猶未饜，思有以中之。因宜賓典史，陷以他事，白府縣捕二人繫之獄。府縣論其罪至死，其黨憤怒，乃聚百人謀劫獄。道路恟恟，皆言私販反矣。敘州屬縣官民皆大恐，署

海軍言 卷十三 二
總督有鳳遣提督按察使將千人往討畏縮不敢前從亂者日益眾筠連高縣相驚以寇至居民譁走而筠連令先以病去署知縣聞變先逃匪黨闖入縣城慶符亦訛言賊來知縣武來雨朝服縊堂上姦民乘機大掠藍大順等趨敘州黨分爲三其左右部掠西鄉西鄉故駐官軍民頗結團自保左右部見兵團則散走其中部千人自橫江渡金沙圍敘州城城中男婦驚啼多欲自殺頃之有鳳遣裨將明耀光入城助守人心始定數日閒賊增至數千人詔陝西巡撫曾望顏爲四川總督徵兩湖兵赴援是時僞

翼王石達開道湖南入廣西聲言由黔入蜀崎嶇黔蜀山谷叢阻弗能達而湖北巡撫胡林翼以楚居下游常欲聯川督資蜀餉以自助因與湖廣總督官文疏薦曾國藩防蜀且言蜀中財富險固宜以時鎮撫繫天下根本五月詔國藩率師入夔州國藩久以客軍懸江西屢爲地方文武吏窘辱及奉

命援浙撥閩皆擁空名無餉權而皖事方棘蜀道迂遠難驟至乃奏言自本年賊擾湖南永郴被圍湘勇在江西者各懷內顧之憂近日寶慶危急距湘鄉不過百里弁勇瞻

湘軍論 卷十三 三
顧身家思歸尤切一旦拔隊征蜀道經楚境必且紛紛請假凡勇之弊敗挫則不知歸伍久征則常思還家今攜湘勇直上夔州水路三千里風濤之惡三峽之險弁勇未必樂從且粵賊現在湖南號稱三十萬若更竄蜀裹脅尤多臣以區區萬人入蜀剿固不敷防亦不足孤軍客寄傷亡難補以勢度之恐無補於大局若遵

諭旨據兩湖之上游則即現在兵力略加水師駐紮宜昌等處即可穩占上游固湖廣之西門若必徑趨夔州則不以兼顧湖廣爲重而以籌防全蜀爲重不特蕭啟江一軍必須調集同行且當添集水陸湊齊三萬人乃可攜以入峽自軍興以來陝西最爲完善而蜀中財物雄厚百物豐饒尤爲逆黨所涎羨

皇上睠焉西顧防患未形洵屬刻不可緩之至計惟臣處兵力單弱不得不縷陳之

文宗以國藩所論重守湖北未籌蜀防仍促國藩入川於是官文胡林翼復言江南賊勢盛宜先所急而袁甲三奏兩淮糜爛請國藩防北路

詔官文國藩等策萬全國藩覆奏臣行次武昌晤商督臣

官文維時探聞湘賊大股全竄粵西前隊已趨義甯距黔省邊界甚近或由龍勝懷遠一帶入黔以遂其竄蜀之謀亦未可定惟以道路計之賊蹤離蜀尙隔三千餘里粵黔兩省萬山叢薄賊多食少勢難遽達蜀境查皖北粵捻各匪蔓延日廣南爲金陵蕪湖之援北爲齊豫數省之患非由楚省派兵馳援不能牽掣賊勢官文胡林翼擬將援湘馬步各軍調回分路進發合力圖之臣自應回軍援皖自當一路

文宗允之乃令蕭啟江率四千人自常德入蜀助剿藍李

十一月藍大順等自敘州分竄一沿金沙江走犍爲一北走自流井官軍防守者望賊旌旗輒投戈乞命賊輒先收其軍械而後驅殺之自賊至自流脅鹽丁竈夫眾至數萬乃申約束禁淫掠附者益夥

十年春藍大順李短搭合走嘉定屯城外五通橋號十餘萬於是榮縣眉州井研青神資陽皆擾蜀中故事總督他移輒以成都將軍權之司道夙事將軍謹衙參與總督同望顏至川有鳳還將軍任成都知府倚有鳳以傾望顏文宗兩罷之命駐藏大臣崇實署總督授東純成都將軍

望顏聞被劾則屏儀從輕輿出入中軍及布政使交侮之時蕭啟江已率湘軍至成都望顏欲以爲按察使啟江遜謝未幾病卒其部分爲三進攻并研一戰破之賊解圍遁自是湘軍頗輕賊而見蜀政淆亂亦乘閒縱掠地方官不敢問蜀民益困矣先是

上命廣西巡撫曹澍鍾督兵援蜀澍鍾故爲蜀監司新守桂林卻石達開

朝廷以其習蜀事故奪情令治軍澍鍾行至蜀胡林翼劾罷之而奏薦東純入川督師

文宗雖以東純署四川總督終慮難勝任欲以四品京堂左宗棠任蜀事詢官文林翼國藩議之官文等奏宗棠新練之軍入蜀非宜而薦劉長佑諳行陣其舊部李明惠劉坤一江忠義席寶田等皆堪任軍旅國藩亦言宗棠識量闊遠吳蜀事分難易請仍令督勇來皖七月

詔宗棠仍襄國藩軍劉長佑防勦廣西難遠離駱秉章馳赴四川督師且以東純未諳軍旅促秉章速入蜀九月秉章治軍將行延湘鄉劉蓉爲幕僚初胡林翼密薦蓉可大用秉章亦夙重蓉名乃令入幕贊軍謀如左宗棠故事而

湘軍將劉嶽昭者久隨秉章黃澗熙者夙善劉蓉二人皆爲大將兵未發而石達開已自廣西走綏甯城步十一月署湖南巡撫翟誥奏留秉章新軍防湖南時東純道卒崇實已受總督印增募軍至三萬川兵故畏怯喜騷擾賊勢蔓延號百萬邛州雅州峩眉潼川皆被圍青神丹棱名山天全榮經洪雅隆昌榮昌江油長甯興文先後淪陷而雲南邊匪出筠連者絡繹於道所過無遮遏浸及川東十一年二月秉章軍次宜昌適皖賊犯鄂疆官文奏以秉章軍一屯重慶一援江西一援湖北而檄黃澗熙東行秉

章策所部不滿萬人難支三路乃留劉嶽昭四千六百入助湖北防剿而自率黃澗熙分水陸泝峽西上期會夔涪頃之石黨圍畢節掠川境崇實遣軍防敘永貴州提督田興恕擊走之時蜀中盼援甚亟崇實屢請

朝旨催秉章入川秉章終虞餉絀恐四川不能供其軍比將入境總督遣官迎候冠蓋望於道悉發夔關稅銀助餉湘軍喜過所望黃澗熙引軍先行聞順慶被圍自萬縣赴之五月戊子朔至順慶賊已先遁南走定遠澗熙躡之賊屯定遠西南連營十餘里然皆烏合無固志湘軍新從郴

桂追石達開鋒銳甚見賊怯益輕侮之逼壘而進賊遽奔
或憑壘發小鎗軍士皆大笑擲火燒其壘賊大亂自相蹂
死者數千是役賊眾數萬一戰而潰蜀人詫爲神兵賊北
走潼川將渡涪阻涪漲而止屯二郎場涪熙遣卒三輩偵
賊所嚮土人皆報曰去遠矣已而知其尙屯場中涪熙懼
失寇令軍士蓐食五鼓行賊聞官軍且至亦夜出行七八
里遇於燕子窩交綏賊卽退涪熙追至場見賊分從兩旁
登山以待知己中伏然勢不能退乃分所部爲三以左右
軍禦伏寇自領中軍直進於是四山賊盡出角聲滿野三

部皆驚潰涪熙驟馬截退者馬陷泥淖中乃棄馬步進而
潰卒不能止涪熙拔佩刀坐地上竟爲賊害涪熙豪邁有
膽略治軍貴迅疾羞言持重然卒以猛進敗論者惜之是
日後軍聞涪熙死結壘自守而賊終懾湘軍威乘勝急渡
涪北去秉章拔用曾傅理以附生領涪熙軍其蕭啟江舊
部以蕭慶高何勝必胡中和領之號湘軍三統秉章自萬
縣移駐順慶期諸軍會縣州於時藍大順圍縣州其黨分
屯綵竹什邡羅江安彭李短搭圍眉州其黨分屯彭山丹
稜青城環省城南北百里內賊氛幾徧官文胡林翼奏川

匪鳴張劉嶽昭一軍擬卽由楚赴蜀駱秉章客軍孤懸徵兵籌餉呼應不靈恐持久難收速效七月

詔駱秉章爲四川總督專軍務崇實爲成都將軍任川陝交界防堵秉章旣受

命劾罷布政使及督標中軍以前總督曾望顏訴其欺侮也八月丁卯朔曾傳理等擊賊緜州敗之賊收屯相保官軍作五浮橋於涪庚午蕭慶高曾傳理分三路抄賊大破之緜州解圍羣賊繞省城西南掠郫邛遁丹稜川北號爲肅清而湘黔軍圍於緜州州堂秉章劾知州唐炯罷之九月

月秉章始至成都受印十月以知府劉蓉署布政使胡中和等自崇慶曾傳理等自彭山進攻眉州敗賊松江口賊奔青神湘軍移攻丹稜以川將唐友耕屯眉州南李短搭分黨掠銅梁壁山永川大足定遠南充岳池廣安增募湘軍以知府易佩紳將之道永順期入酉陽時石酋黨由黔西竄江津攻黔江入湖北來鳳達開自將四五萬眾道靖沅趨鎮筸劉嶽昭引軍赴施南援來鳳秉章慮賊出秀酉嶽昭兵力單咨署黔撫田興恕撥兵赴松桃銅仁會剿上念川事急促嶽昭迅扼夔萬十一月增軍圍丹稜乙未

賊焚城走蒲江略崇慶雙流界入彭縣復分兩部一東北趨緜州走江油平武折北走石泉彰明一東略什邡漢州中江遂甯折南走安岳內江隆昌富順所過民團營兵往往狙擊斬虜藍大順遁去其黨遂微而李短搭踞犍爲之鐵山分股踞青神川東賊自廣安分掠營山渠縣東鄉新甯逆倅猶張

同治元年正月石達開由龍山入咸豐宣恩與來鳳賊合窺施南劉嶽昭截之龍橋追殺三里壬寅克來鳳達開前隊入利川夔萬戒嚴徵劉嶽昭易佩紳會師夔州二月達開由利川僻徑竄石碓至酆都之羊肚溪渡河官軍截之乃循南岸至涪之小河時藍李別黨踞涪州南鶴游坪新甯墊江賊合走酆都三寇相距或數十里或百里然不相聯貴州提督田興恕自請赴川剿賊秉章奏允之上慮黔楚軍夾攻逼賊入陝

諭陝西巡撫瑛榮防興安定遠陝甘總督沈兆霖亦遣兵防階文劉嶽昭至夔州前軍二千五百人自萬縣溯江上與唐炯等期會涪州三月達開自小河道朱家觜涉淺偷渡圍涪州城掘地道疾攻之會嶽昭炯軍畢至唐友耕分

兵城守內外夾擊悉破仰天窩堡子城賊壘禽斬近萬涪
州解圍賊走蘭市嶽昭率後隊二千至涪道員張由庚扼
李渡溪截賊北渡兼顧鶴游坪嶽昭友耕渡江北趨重慶
出賊前炯駐涪防回竄李短搭自鐵山走宜賓遣黨援青
神蕭慶高擊走之青神賊併入宜賓分屯天洋八角砦蕭
慶高遂收青神酆都賊東北略忠萬走雲陽田興恕遣總
兵熊煥章將千五百人援蜀四月石黨掠南川趨貴州桐
梓達開領數萬眾圍綦江掘地道裂南城知縣楊銘鑿內
濠堵截之唐炯聞警馳援燒賊營楊銘率團勇出城夾擊

賊解圍走於時劉嶽昭屯江津先市場曾傳理屯合江以
蔽瀘州唐友耕自重慶馳至與唐炯合達開乃西走貴州
仁懷繞山徑入敘永廢城西北走興文時川匪圍江安曾
傳理引軍趨江安川匪與石黨合陷長甯劉嶽昭會唐炯
擊破之賊走珙縣雲陽賊西北陷太平遂走陝西定遠易
佩紳尾之與俱入陝先是粵賊陳得才馬融和結捻匪入
武關由孝義出山窺省城遂陷渭南殺知縣曹士鶴西安
戒嚴而川匪藍大順等屢挫於湘軍踉蹌逃死既至陝西
與粵捻合藍大順踞洋縣陷佛平其弟藍二順踞商州山

陽於是秦中騷然無甯歲矣。五月，劉嶽昭破賊沙河驛，進屯花灘。曾傳理熊煥章破賊高縣巡檢寺，賊遁回長甯。六月，劉嶽昭等克長甯，石黨還走敘永。圍永甯，總兵吳安康擊走之。鶴游坪賊分略梁山，墊江大竹鄰水。七月，復分黨陷開縣，從城口出陝境，陷平利。漢南羣盜蠡起。八月，李短搭棄八角砦，走犍爲。胡中和圍之龍孔橋。閏八月，劉蓉出督軍，丙子，李短搭突圍走。胡中和生擒之，並獲其黨魁卯得興。短搭名永和，以其髮短，川滇人呼爲李短搭。搭云：藍李亂蜀四年而平，其流毒及於陝西矣。初，陳得才聞僞英

王陳玉成敗，銳意援皖，自陝西竄河南，陷閩鄉，圍南陽。藍二順由山陽入湖北，陷鄖西。比聞陳玉成已誅，乃折而西，合粵捻四五萬，由浙川襲荆紫關，踞之。

詔荊州將軍多隆阿督陝西軍務，多隆阿所部皆楚軍，自皖鄂西上攻荆紫關，克之。陳得才還走湖北，多隆阿躡之樊城。十月，粵捻竄隨州德安，北走河南，復西犯鄖陽，入平利，而川匪在陝者掠洋鳳階文，還入廣元。駱秉章遣總兵周達武拒之，石達開復陷筠連，略宜賓高縣。秉章遣胡中和等屯敘州之橫江。十一月庚申，胡中和蕭慶高何勝必

大捷於橫江。斬馘逾萬。劉嶽昭攻雙龍橋。約賊內應。克其壘二十餘。石黨出甯遠。辛酉。周達武遇賊儀隴。破之。曾傳理以內寇既平。請罷軍歸楚。惟留胡中和。劉嶽昭。周達武防石黨。時達開已入雲南東川。陳得才擾漢中興安。陝軍久無功。

詔駱秉章舉大將分兵往討。奏薦李雲麟。雲麟隸漢軍旗。以諸生轉戰鄂皖。積功至郎中。時屯鄖陽。故令其入陝。詔江西布政使李桓任陝南軍事。

二年二月。秉章遣張由庚領五千人援漢中。石達開復自滇入川。先嗾中旗賴裕新出甯遠。李復猷趨黔境。自領大隊三四萬。由米糧壩渡金沙江。裕新爲官軍所殛。餘黨竄榮經天全。奔至平武。入甘肅文縣。三月。達開將出甯遠。誤入邛部土司。與所分兩部隔絕。達開偵越嵩大路。有漢夷兵。乃從小道至紫打地。將過大渡河。前隊結筏已濟矣。日垂暮。達開懼官軍來襲。令濟者返西岸。期明日畢渡。是夜暴雨。大渡水溢數丈。而唐友耕防軍已至。列戍河岸。達開糧罄路窮。乃射書于戶王應元。約讓路。略以重利。復使人說土司嶺承恩。乞緩兵。皆不得。則盡殺嚮導二百餘人。憤

怒出巢將亂流渡水湍急登筏者輒溺乃止達開久處絕地益困憊無所得食日殺馬煮桑葉爲糧四月王應元嶺承恩偵賊已衰率漢夷兵蹙之達開部黨解散奔老鴉漩眾猶七八千夷兵前阻輜重盡失其妻妾五人抱幼子沈於河諸僞官多自溺死達開知大勢去豎旗乞降嶺承恩縛獻官軍劉蓉親至受俘並其黨魁五人檻送成都梟誅之解散四千餘人其李復猷竄黔境者由酉陽走湖南至廣西破滅復猷殛於廣東連州達開於初起諸僞王中號爲愛人所至假仁義要結附者頗眾自韋楊構殺達開突走江西自爲一部圖割據自雄粵閩楚黔爲之奔命者七八載達開旣誅西南諸行省稍稍息肩矣時粵賊四僞王麇集興安漢中眾至十餘萬陝西布政使毛震壽師久無功李桓行至湖北以病免

詔促李雲麟入陝且責湖廣總督官文湖北巡撫嚴澍森母以鄰爲壑於是官文等乃令雲麟率鄂軍三千餘人由鄖陽渡漢道員梁作楫屯鄖竹顧楚西門五月

詔李雲麟以四品京堂勦匪陝南川陝諸軍聽節度命駱秉章增撥勁旅援漢中官文等復薦劉蓉堪疆寄

湘軍言 卷一三
四
詔蓉率湘軍踰劍閣而北與鄂軍合先是
欽差大臣多隆阿討陝西叛回已克馮翊諸壘師次交河
口患痢不能軍以穆圖善陶茂林素持重跨渭而營令驍
將朱希廣趙希發壁北岸當賊衝誠之曰堅壁勿戰吾自
有法破之母輕出也已而多隆阿病劇朱希廣等不能耐
果輕赴敵敗死多隆阿力疾臥肩輿中督戰克高陵涇陽
而病實猶未瘳也

上念陝事棘瑛檄久不得要領李雲麟母喪假歸乃以劉
蓉督陝南軍務七月授爲陝西巡撫未至以按察使張集
馨暫權之時毛震壽屯城固川匪屢自洋縣來犯卻之震
壽以漢中圍久領三千人往擣東關翼通糧道易佩紳率
師來會東關賊且七八萬我軍戰不利佩紳突圍出至十
八里鋪復爲賊挫漢中知府張光澍詣川軍乞援張由庚
徘徊未進光澍憤與賊戰敗績於是外援益絕自漢中至
褒沔賊氛延袤二百餘里駱秉章乃以何勝必蕭慶高朱
桂秋萬三千人隨蓉北征糧械供之川省初石達開餘黨
所稱中旗者自隴入秦與川粵匪合中旗用僞翼王旗分
屯定軍山圓墩子因爭糧相鬪羣酋頗懷猜忌於是僞扶

王陳得才僞天將馬融和欲東援金陵僞啟王梁成富以傷故誓取漢中僞增王賴汶光屯漢中西北僞端王藍成春屯漢中東南而藍大順聞鄂軍且至結陳得才東陷鎮安八月李雲麟至襄陽以李桓所部千五百人屯興安劉蓉發成都時川軍援陝南者張由庚進雲峰寺易佩紳扼兩河口蕭慶高何勝必進高家嶺以援漢中周達武出大安驛規褒河己丑蕭慶高率中軍攻油坊街何勝必張由庚出其左易佩紳朱桂秋出其右甫進油坊賊潮至褒河賊復自新集抄入張由庚先潰諸援軍隨之靡城中糧久絕兵民望見恟懼甲午開北門出走漢中遂陷辛丑城固亦陷敗書聞劉蓉止巴州增調劉嶽昭軍四千五百人九月遣將回湘募勇川匪見粵捻勢盛頗懼分黨北收佛坪盤屋以自固李雲麟進軍山陽取鎮安西攻石泉十月劉蓉移屯廣元久之蜀軍不出十二月駱秉章奏言漢南賊勢蔓延甚廣湘軍新挫之後難以驟振臣增撥九營由保甯赴巴州聽劉蓉調遣此時劉蓉若徑率各軍出青石關以規漢南賊得以全力抗拒難期得手須俟新募楚勇到齊數路並進則漢中可望肅清川境不至蹂躪

詔曰劉蓉受命撫陝將及半載九月閒奏請派員回湘募勇計時亦應到川著卽星速前進駐紮青石關力圖克復漢中城固會合李雲麟約期進攻以解漢南倒懸之厄毋得任意遲緩會僞天王洪秀全召援金陵陳得才乃謀東走

同治三年正月襄沔留壩賊併入漢中陳得才等率二十萬眾分水陸東行於是漢水賊艦蔽江步騎走鎮安山陽商南絡驛連十許日癸丑官軍收漢中戊午收城固興漢諸屬邑皆復而川匪亦棄洋縣北保盩厔增柵濠堅守盩

厔城小而固多隆阿將赴甘肅追討叛回懼川匪乘其後乃圍盩厔劉蓉已至漢中則奏免丁糧卹忠烈給牛種瘞尸骸以收人心留何勝必等分屯漢中興安罷劉嶽昭軍還蜀且聲言助攻盩厔多隆阿大恚移檄止其軍二月多隆阿攻盩厔月城誠諸將曰吾休番迭擊彼不能安處矣不出兩日賊必走走則必由西門西門近山吾預伏兵藍酋可擒也乃親登礮臺鳴鼓督戰飛礮傷左目鼓聲益急賊果乘夜由西門遁丙申克盩厔其酋中數鎗率十餘人逸至南山爲民團所殺猶自稱藍大順三順至九順皆傳

首漢中或曰大順死川中據洋縣者曹逆也於是川匪剗除略盡惟秦州賊復東趨留壩佛坪商南殘賊西與之合多隆阿創甚養病西安三月劉蓉至省城四月癸未西安將軍多隆阿薨

優詔賜卹

子諡忠武陝甘等省皆建祠多隆阿齊齊哈爾城人轉戰鄂皖有功爲胡林翼所重所部皆楚軍陳玉成之滅多隆阿功爲多平生不識漢字用兵自與古合其料敵決策人訖爲神奇自僧王塔齊布外勛績莫與爲比統兵十餘

年所得祿賜分贍將士未嘗私其家每家書至輒手碎之曰勿令擾我慮也及其卒中外惜之

詔穆圖善爲荊州將軍接統楚軍回援湖北以粵捻皆萃鄂境也川匪藍二順自鄖西入陝聲言復仇五月合僞啟王梁成富從閒道出大峪西安大震

詔切責劉蓉李雲麟留穆圖善後隊在陝會剿賊由子午鎮灃河陷鄠縣傍山西走金順馬隊邀擊敗之蓉以多部大半赴鄂咨雲麟自興安援省城

詔慮興漢空虛令雲麟屯漢中扼華陽佛坪留壩屏蔽四

川六月蓉與穆圖善親攻鄂縣曹克忠敗賊黑水峪賊目葉毓廣降七月曹克忠收降賊王克昌等四千餘人鄭永和等五千餘人王克昌者隸偽啟王部鄭永和者偽翼王餘黨所謂中旗者也甲辰劉蓉穆圖善會攻郿縣王子賊踰秦嶺西走略陽入甘肅陷階州陝西軍罷周達武出屯防蕭慶高等防漢中十月周達武進攻階州十一月徵蕭慶高等會師何勝必以疾留廣元胡中和自敘南防所出廣元代領其眾攻階州令黃鼎自募一軍助之

四年五月胡中和等克階州藍李餘黨盡平蕭慶高還鎮

漢中周達武進軍松潘討叛番番據險抄掠所部八千人驚幾潰九月略地置臺站如承平時

詔授周達武貴州提督始議撥黔巡撫劉蓉罷以四川按察使趙長齡代之蓉未遇時懷奇自負不肯隨時俯仰同邑曾國藩雅重其文行其贈詩有四海一劉蓉之語年三十六猶偃蹇不得一衿湘鄉知縣朱孫詒召赴縣試舉爲首始補生員國藩在江西蓉隨戎幕浚保知縣同知銜胡林翼謂其才可大用密疏薦之沈淪下僚時人未之奇也駱秉章之援蜀初保知府遽奏權藩司

朝廷因而畀之順天府尹蔣琦齡陳時事頗譏論蓉蓉乞罷而秉章疏請留蓉及擢陝撫編修蔡壽祺上書言事復訾蓉夤緣蓉憤甚抗疏力辨盛自稱許其略曰凡夤緣者必其平日縈情於寵利不勝其歆羨戀慕思一得之以快其意然後喪其本心捐廉棄恥而爲之臣雖愚陋其於希榮慕祿降志辱身之事往往不待禁而自絕於心蓋其自治尙有精於此者而此特其粗節乃蔡壽祺以其不肖之心肆情造謗惟所欲言直欲厚誣天下謂無復有稍知廉恥之人事則何其情之悖也又訐奏壽祺前在蜀劣蹟

事下秉章案驗於是御史陳廷經復疏攻蓉部議奪蓉一級蓉在陝承兵燹彫敝之餘專意撫綏不復募帶勇營然賊至用城守兵自將出戰輒擊走之在官潔清自守察吏愛民其傲岸自高亦往往爲世所排擊十月趙長齡移撫山西復以蓉爲陝撫駱秉章請疾崇實兼四川總督惟軍事仍倚秉章於時川陝內寇略定

五年二月劉嶽昭擢雲南巡撫將所部湘軍轉戰以往十月捻酋張總愚竄商州西至朝邑甘回犯甯州陝中大擾詔催提督鮑超入關十一月劉蓉遣軍擊捻於華陰敗績

湘軍記 卷十三
三
詔罷蓉以喬松年代之蓉仍領軍事是月四川總督駱秉章薨癸酉天大雪捻自臨潼趨省城官軍屯灞橋爲騎賊所抄總兵蕭德揚敗死陝軍三十餘營皆潰蕭何舊部遂盡

詔左宗棠督陝甘軍討捻回提督劉松山領老湘營入秦劉蓉歸老於家其後京卿劉錦棠率師出關威稜天山將軍穆圖善金順領鄂軍西征屯車師烏孫楚人戰績遍西北矣

王定安曰駱文忠沈毅靜鎮碌碌若無所能而其大用在任賢不貳屈己以從人古之仁賢諸侯眾矣其建偉勛熙鴻號者必得魁材哲士師事而友暱之如管仲趙衰百里奚樂毅之倫苟其材也雖舉國以聽可也自宋以來世議漸隘士大夫喜自賢在上位者不屑屑授人柄苟有所倚任則舉世駭然不以爲侵官卽以爲撓權若駱公之休休好賢若已有之豈非古大臣風度哉當其在湖南獨任左文襄籌餉募兵事專於幕寮讒叢毀積而弗之改於是援師四出捷音望於道勛業巍巍被鄰省矣文襄旣已大任乃挈劉公蓉籌蜀事用諸生不三載超擢藩撫劉公勛望

湘軍記
卷十三
不逮文襄。要其文章志節。固一時之傑也。駱公既薨。蜀人野祭巷哭。爲之罷市者累日。稱頌功德。則皆曰。蜀中自諸葛武侯以後。一人而已。嗚呼。任賢之效。豈不大且偉歟。

湘軍記卷十三

東湖黃學濂校字

湘軍記卷十四

東湖王定安撰

平黔篇

漢西南夷君長數十。其大者曰夜郎。曰滇。今之雲南貴州。是已。貴州之地。東西距二千里。嶄巖密箐。苗夷交錯。田磽而民瘠。

國家沿明制。設巡撫於貴陽。賦稅所入。歲十餘萬金。纔敵江浙一大縣。雍正乾隆間。大學士鄂爾泰總督張廣泗等。開闢苗疆。地拓而戍益增。兵精官祿。仰給他省。有事則調

海軍詩 卷十四
川楚兩粵兵竭天下財賦圖之蓋荒陬險阻苗情慌忽經營若斯之難也自洪楊亂起東南隩區淪於賊協黔之餉不至巡撫奏徵兵餉

朝廷輒指鄰省助其急鄰省方自謀難兼顧率用空文相餽遺無實濟然貴州尤近湖南踞上游之勢苗患朝發則楚邊夕受其敝故湖南之援黔所以紓鄰禍亦所以固吾圉非好勤遠略之謂也黔亂之興首發禍者安順興義厥後蔓延日廣益紛厯不可治然總其名有六曰苗匪教匪曰黃號白號其小者曰槓匪神匪其他濫練游勇逆回悍

夷揭竿踵起者不可枚舉而粵賊石達開往來蹂躪猶不在此數焉苗匪者稱九股黑苗其種族散居八寨麻哈清平黃平鎮遠施秉天柱及黎平銅仁諸屬崗寨深阻人跡罕至而張秀眉高禾爲之長張秀眉者統清江台拱邛水施鎮生苗及九股黑苗皆其爪牙其黨魁包大肚潘老冒姜老拉分據要害相犄角而天柱思州民室數百爲所脅服輸金納賦供其役使高禾者本革夷種胡林翼在黔破滅革夷高禾與九松等三十餘人逸出爲盜旋就撫充苗練從征湖北以騷擾遣歸潛居清台煽羣苗爲亂苗之禍

自高禾發也。其踞貴西與川黔軍相拒者，其酋數十而金大五、陶新春爲之長。金大五者，本名李開元，其父曰僞李王，與教匪高禾、九松倡亂，僞李王死，襲僞位，僭號英明王。其黨魁嚴大五踞黔西，楊大六踞丹江，爲之羽翼。張秀眉等亦秉承號令，弗敢違。陶新春者，踞畢節之猪拱箐，有眾數萬。時掠川滇邊地，而苗夷土匪散勇游民雜處其中，亦貴西巨寇也。教匪者，其魁數十，其徒黨數萬，分踞平越、開州、修文、貴定、安平、定番、廣順，屢犯貴陽省城，而何得勝、潘明傑爲之長。何得勝者，踞烏江，其巢曰尙大坪，於諸賊中

最兇悍，所謂何二強盜者也。潘明傑者，分踞都勻屬地，其巢曰罷芒，常結何得勝攻貴陽，而黃么獍時爲何潘之助。省城幾陷者數矣。號匪者，起四川，其魁自涪州敗露，逃入思南，煽民團爲變。黃號曰濟安團，白號曰致和團，有眾十餘萬，居思恩屬者十之七，石阡屬者十之三，而劉義順爲黃號之長，胡黑二爲白號之長。槓匪，狎匪者，其黨稍微，狎匪出沒郎岱、鎮甯之間，槓匪距大定之水城，掠平遠，然皆借猪拱箐、苗酋爲聲援，此其略可指數者也。初咸豐四年冬，興義安順匪起，陷普安及安南城，巡撫蔣蔚遠督軍遵

義討之。奏徵湖南兵赴援。其時永順有土寇駱秉章遣辰沅兵往捕。未遑西也。

五年三月。苗匪楊隆禧作亂。焚黃平舊城。羣苗響應。九月。教匪自麻哈踵起。應之。遂與之合。每出掠。教七苗三。戰則倚苗銃爲助。得上腴地。則苗徙家畊焉。食匱。則苗輸之糧。有小挫。則苗教大出。鉦聲滿山谷。十月。銅仁舉人徐廷杰以苗教猖獗。假苛征聚眾陷城。殺知府葛景萊。洞苗從之者萬人。十一月。出陷松桃。遂攻鎮筰。掠麻陽。晃州。湖南官兵躡擊之。羣匪散走。留兵戍松桃。銅仁。

六年。蔣爵遠以同知王敬烈知銅仁。因案株連。五洞團丁皆叛。五月。銅仁匪攻江口。湖南戍兵破之。將士多傷。復增兵往屯。是時貴州吏無敢官銅仁者。乃以知縣彭瀾攝知府。知府楊書魁護貴東道。書魁將三百人於道被匪劫。所部先潰。囚書魁。瀾懼出走。亦獲之。鎮筰總兵屯界上。與銅仁戍軍遙相應。七月。匪犯晃州。九月。松桃石峴苗窺永綏。而永從苗先犯通道黎平。六洞苗入靖州。復合土寇陷古州廳城。沿邊屯砦焚毀略盡。於是湖南西防益急。而自銅仁達辰州。乘沅水數日可至。駱秉章尤注意守銅仁。以自

洲軍誌 卷十四
四
蔽匪攻銅仁。湖南戍軍擊卻之。乃趨鎮筸。戍軍乘虛襲破其壘。銅仁解圍。十月。戍軍攻三元屯。破其三堡。躡之三角莊。羣苗與土寇離潰。悉捕諸酋誅之。楊書魁始出於賊。蔣爵遠聞楚師大捷。則大慙。愠。仍檄王敬烈知銅仁。撓之。秉章乃檄戍軍還湖南。十二月。楚師出靖州。討永從苗。七年四月。攻克金山砦。苗繞犯靖州。卻之。楚師進黎平。增兵攻永從。六月。克其城。檄貴州將韓超駐黎平。招撫六洞苗。資以餉銀三萬兩。韓超秉章所薦拔也。是年八月。思南號匪始起。

八年三月。廣西懷遠盜合黔苗犯黎平。秉章遣副將田興恕入黔助拒之。時鎮遠復陷。而思恩銅仁苗教號匪眾數十萬。援軍枝柱思州。清谿。玉屏。邛水。間。頻以捷聞。

九年八月。石達開入黔邊。聲言假道窺蜀。思州苗爭起。應之。九月。楚軍攻思州。破風崖等五砦。進攻鎮遠。苗輒棄壘走。我軍守其空城。闌市皆墟。十月。石酋竄南丹。窺獨山。荔波。秉章檄田興恕分軍進黎平。視石黨所嚮爲戰守。

十年三月。

詔擢田興恕署貴州提督。增軍滿二萬。湖南供其餉械。四

月石黨自廣西西隆渡紅江入黔掠興義貞豐歸化另股擾黔邊興恕部將沈宏富要擊於石阡六井山毀其壘二十一宏富屯寶溪賊悉銳來犯設伏擊走之乃分陷廣順永甯五月陷歸化署安順知府周夔參將全興戰歿遂圍鎮甯分黨掠安順安平苗教號匪聞粵賊至乘機肆出陷修文附省數十里寇氛殆遍而石黨前鋒已至羊昌河省城戒嚴劉源灝飛促興恕赴援興恕奏言黔省上游道路分歧可黔可蜀若賊以一股擾黔一股入蜀道遠兵單斷難兼顧現飭韓超防鎮遠沈宏富趨湄潭劉義方進松桃臣駐石阡居中調度如石逆止竄卽親會川兵堵剿如其窺楚卽馳回靖州

上以貴陽危急促興恕間道援省城六月石黨分股下竄其一由龍里走都勻麻哈至羅斛其一由長寨走歸化與土寇合而石酋所謂後旗者在永甯其黨離貳殺其僞宰制余忠扶遂走獨山教匪導從僻徑襲州城七月甲午陷獨山殺知州侯雲沂乙巳總兵巴揚阿復歸化歸化賊走長寨陷定番殺通判恩常八月掠青巖十月獨山賊掠平浪定番賊陷長寨同知劉宗元罵賊死是冬獨山賊還走

廣西融縣入湖南

十一年正月定番賊還走廣西慶遠二月安順賊合狎匪渡六圭河圍畢節掠梓潼關署巡撫何冠英提督田興恕遣楚軍自大定前擊杜其入川三月黎平苗犯靖州掠通道綏甯石黨從之復走義甯靈川湖南軍皆南防五月畢節賊陷大定團營楚軍李有恆等破之歸化橋戊戌有恆等擊賊畢節西南門破其壘二十六畢節圍解八月石黨自仁懷竄桐梓楚軍楊巖寶等躡之殛其酋朱洪新別股李添亡全數殲焉餘賊入四川至涪州白馬鎮先是駱秉

章奉

命督四川軍布政使文格署巡撫未幾

改命按察使翟誥秉章行至半途劾罷之

詔毛鴻賓爲湖南巡撫

朝廷以石酋詭譎其黨徒往來黔粵慮結苗教大出爲楚蜀害尤倚任楚軍

擢道員江忠義加二品頂戴署貴州巡撫湖南故主貴州兵餉鴻賓以西南防急奏留忠義領軍比於部將十月石黨陷會同十一月攻黔陽陷瀘溪鴻賓劾忠義委軍歸葬

湘軍記
卷十四
七
罷其貴州巡撫

詔改提督更以道員韓超加二品頂戴代忠義石酋自靖州走沅江麻陽趨浦市而東西窺四川其黨先陷湖北來鳳石酋至永明與之合羣賊西入川道員劉嶽昭圍來鳳詔嶽昭自東而西田興恕自西而東夾擊之

同治元年正月授興恕欽差大臣專督貴州軍責餉湖南毛鴻賓怒奏停其協餉未幾興恕罷興恕忠義皆起行伍有驍勇名所至賊畏之然在湘楚爲偏裨才其勛望比於羅李彭楊瞠乎遠矣自布衣不十年至專閫監司訖持帥節佩督師印年纔及壯鴻賓陰忌之以爲不厭眾望二人竟以劾免當二人初被

恩命感

聖主殊遇奮發思立功名以報

國及其罷黔事遂不振興恕之兼權巡撫也天主教人與黔民鬪乃捕斬其教酋法郎西公使憇之

朝吏議奪官時川寇亟興恕自請率兵入川聽駱秉章節制

詔許之三月回匪陷興義石阡銅仁苗匪攻鎮道營壘悉

陷之遂攻邛水戍軍潰匪南掠松桃北攻天柱湖南增兵防晃州

詔責韓超專恃援師負疆寄五月復徵湖南水師扼沅水七月援師進天柱邛水匪散走收其城八月攻漢若擲火燒之匪驚遁是時秋瘴起援師畏毒癘皆還晃州閏八月石達開自綦江入黔分三隊隊各三萬餘人一走黔西一走遵義一走桐梓遣沈宏富李有恆全祖凱等逆擊敗之賊分掠仁懷綏陽畢節郎岱官軍躡之乃由普安遁入滇十月復道鎮雄入川陷筠連高縣

詔張亮基督雲南軍

二年正月思南石旰苗教合踞荆竹園攻陷印江結銅仁匪分犯清谿玉屏以張亮基督貴州巡撫勞崇光署雲貴總督二月石黨自鎮雄掠畢節猪拱箐苗匪應之陷林口團營另股由昭通入威甯於是水城郎岱平遠皆擾三月清江苗陷古州攻黎平楚邊姦民多為所誘鎮雄粵賊走大定昭通粵賊走遵義四月遵義賊走黔西桐梓勞崇光行次綏陽與賊遇入旺草寨召鄉團迎擊飛檄沈宏富樊希棣等率二千人渡河截之田興恕率千人繼至合擊大

破之擒斬五千餘崇光以捷聞且言粵賊現屯南坪界連
正安婺川勢將入蜀興恕前奉

旨赴川差遣應令至成都聽駱秉章節制

詔以教案未結罷其行其後竟論戍邊四月石達開殛於
蜀其黨李復猷走婺川七月至酉山秀山間道入松桃同
知劉侶鶴躡之湖南邊八月入永綏掠會同綏甯走廣西
遂訖於滅石寇平十月楚師出援黎平是年毛鴻賓擢督
兩廣惲世臨代爲巡撫檄周洪印戈鑿援黔

三年正月貴西苗匪陷開州修文貴陽戒嚴二月援軍收

古州益西攻都江五月苗匪陷天柱玉屏七月犯沅州掠
沅靖五縣十月黔軍復興義回匪遁十二月官軍復收玉
屏大徵諸軍屯沅晃奏以趙煥聯整飭諸軍

四年二月惲世臨罷李瀚章爲湖南巡撫

朝廷以洪寇平垂意滇黔下曾國藩李鴻章等等籌論全局
三月國藩奏曰查滇省於天下爲最遠黔省於天下爲最
貧當此事局糜爛之餘實有鞭長莫及之勢然

皇上紹承大統雖在新疆萬里之外猶且尺土在所必爭
一民在所必救况滇黔尙屬內地豈得不力圖遠略規復

舊基自古行軍之道不一而進兵必有根本之地籌餉必有責成之人故言江南者必以上游爲本謀西域者必以關內爲本理有固然古今不易臣愚謂謀滇當以蜀爲本卽以籌餉責之四川總督謀黔當以湘爲本卽以籌餉責之湖南巡撫蜀之南多與滇鄰湘之西多與黔鄰進剿卽所以自防勢有不得已者義亦不得而辭惟旣令其專謀一方則不能兼顧他省試就湖南言之近年西剿貴州東防江西本省之兵爲數不少而又有東征一局以巨款解濟皖吳此外又有滇捐之局黔捐之局江西捐局浙江捐局各處之籌餉愈多則本省之進款愈少斷不能大有作爲上年憚世臨派周洪印戈鑑等進剿貴州連克古州都江上江天柱四城黔民已有來蘇之望當時若能乘勝進取北剿鎮遠南攻都勻卽可與貴陽省城通氣勞崇光亦不至坐困若此因湖南餉項無幾憚世臨不敢募勇添營大舉深入致負黔人之望今

皇上慨然遠慮思出黔民於水火飭臣與李鴻章妥爲區畫新任撫臣李瀚章本在臣營六年之久又係李鴻章胞兄金陵回湘之勇蘇軍得力之員多與李瀚章相知相信

沐軍言 卷十四
若令選將練兵專圖黔事必可次第奏功但東征局既裁之後只能酌添本省之釐以濟平黔之餉不能多供甘肅更不能分濟雲南謀一則情專餉分則力薄此謀黔之一說也又就四川論之近年肅清本省協濟外省亦已悉索做賦籽柚久空成都去滇省近三千里萬山叢雜兵多則糧運極艱兵少則回匪難制卽竭蜀力以圖雲南尙恐難濟又況川北之保甯龍安須以重兵防甘肅之賊川南之酉陽瀘州須以重兵防貴州之賊其勢不能專事滇境而盡棄他處然滇省孤懸南徼惟四川相距稍近昭通東川

三府康熙以前本隸四川雍正年間始隸雲南

皇上不忍置滇民於化外舍蜀別無下手之方倘使四川督臣能兼督辦滇省軍務之銜或竟赴敘州駐紮半年調度一切每月專解滇餉四五萬撫臣林鴻年進紮昭東庶幾有恃無恐而文武兵勇之相從入滇者去其有往無歸之懼乃可致其立功殺賊之心數月之後果能於昭東立定腳跟修明政事滇民感

天子之不棄遐陬信撫臣之足資保障相率來歸共圖勦回之法然後開銅廠以興鼓鑄造戰船以利轉運或可挽

同全局此又謀滇之一說也張亮基欲徵兵於蘇皖林鴻年欲分餉於長沙其用心良苦而其成效難期倘蒙俯采臣言以黔事責之湘撫以滇事責之川督則甘肅之餉應責成江蘇江西浙江湖北四省臣等均不敢有所推諉詔允行之是時四川無事

授劉嶽昭雲南布政使駱秉章以其軍援貴州四月進攻正安以援遵義五月克正安嶽昭遂駐軍貴西而湖南之軍方議合四省防粵賊汪海洋安仁攸縣受霆營叛卒之擾八月增兵防郴桂悉汰援黔諸軍爲二十營以周洪印

領之十二月汪海洋及叛卒皆平李瀚章始議援黔五年春楚軍增至二萬分三路出貴東以兆琛周洪印爲大將出靖州起前按察使李元度募新軍出沅州兆琛以知縣至湖南臬司周洪印以千總至總兵自黔事起領兵幾二十年號爲諳習邊情

朝廷方憂黔亂揀知兵者爲監司遷兆琛貴州布政使席寶田貴州按察使而責江西巡撫劉坤一月供寶田餉四萬其時寶田解兵歸里軍未集也兆琛雖久領黔防沅靖被寇自如元度懲前失銳意攻砦聞石阡荆竹園號匪勢

盛率周洪印親攻之。匪負隅固守，官軍勇無所施。或時出戰，見大軍出，則皆走險阻自保。時乘雨夜盜掠士卒，值其卧輒竊殺之。荆竹園久不下，苗匪往來如故，邊縣不常其得失。於是前失職者頗議元度治兵無以異於兆琛。湖南月餉十餘萬，爲勞費矣。回匪陷興義，殺漢民萬三千戶，遂掠永甯鎮甯，及普安廳踞之。是時劉嶽昭駐貴西，克綏陽匪首吳元彪，故練弁嶽昭令帶千二百人自贖，進攻同心寨，克之，擊破黔仁號匪，解遵義圍。

詔擢嶽昭雲南巡撫，令先清黔匪，與湖南援軍上下夾擊。嶽昭奏言：黔中羣盜如毛，飄忽無定。此次由黔西大定進兵，勦平一處，卽須拔營前進，不能留兵代守。倘州縣不得其人，兵去賊來，勞而無益。應由貴州撫臣揀賢員籌善後。上可其奏。時貴西郡邑陸沈，苗砦匪巢，蟬聯蝟集，延袤千餘里，不可爬梳。貴陽孤立賊中，巡撫號令不能出城外。嶽昭乃議先攻仁懷黔西，保清鎮以達貴陽。且言省城重地，文報不通，譬如治病者，咽喉不能下藥，心腹不能運氣，而欲起四肢痺痿之症，雖良醫亦有所不能。

朝廷以爲至論。八月，進攻仁懷，復之。環仁懷皆號匪巢，其

名者楊閃西踞馬滾坡周大汝踞羊窩譚鄭二酋踞大小
壘汪草登楊四妹踞大壩簸箕壩各擁眾數千遙恃黔西
巨寇何正舉爲聲援正舉烏江何得勝黨也嶽昭遣將截
黔西援匪乃引軍深入縋幽鑿險轉戰五十餘日悉破平
之仁懷肅清留兵代戍十月進黔西克來蘇場擊何正舉
大破之斬千餘人遂克平壩望山正舉遁歸棗竹山棗竹
山者高五六里孤峰削立三面巖絕無路四圍密箐繚以
石垣嶽昭先遣人斷其汲道揀敢死士數百乘夜攀藤緣
磴上比逼巢列炬鳴鼓匪愕而礮擊士卒仰攻者多傷亡

而山後伏兵火起照耀巖谷羣匪多墜崖死遂克棗竹山
是時楚軍聲威大振羣匪爭乞款十一月仁黔苗號二十
餘洞歸誠解散萬餘人十二月襲破沙窩黔西解嚴嶽昭
遣將護餉入省貴陽運道始通於是駱秉章崇實張亮基
嚴澍森爭疏留嶽昭緩赴雲南澍森時以廣西臬司奉
命查黔事因陳三路進兵之策以大定爲西路劉嶽昭任
之貴東各郡爲東路李瀚章兆琛等任之遵義爲中路席
寶田任之且言東路鎮遠思州都勻黎平四府困於苗匪
銅仁石阡思南三府困於號匪中路貴陽平越遵義三府

州則苗教雜處。或寨堅巢險。一夫當關。萬夫莫越。或蟻聚蜂屯。一人響應。萬醜景從。湘軍血戰於荆棘之叢。效命於虎狼之穴。即使尺攘寸收。間有所得。而朝取暮失。退守無從。攻苗匪則號匪梗其中。擊號匪則教匪繼其後。劉嶽昭兆琛兩軍相距千數百里。遠者二千里。陸有崇山峻嶺之阻。水有重安清水烏江之隔。此限於地勢不能遽合者也。嶽昭部兵才七千。以之通仁懷。剿黔西。清大定。攻猪拱箐。前有林立之強寇。後無可靠之勁旅。祇此孤軍奔馳數百里。即使事機順手。非經年累月不能成功。若再令折回遵

義。則大定軍事付之何人。事機一失。嶽昭永無赴滇之日。湘軍終無夾擊之期。此席寶田之所以必出中路者也。

詔下其議於李瀚章。且促席寶田募舊部六千。道常德以達遵義。

六年二月。嶽昭克修文之大聖。朶朶壩。解平遠圍。猪拱箐。苗酋陶新春見官軍日逼。約號匪魏洪發。黃洪順。糾苗教萬人自安順安平橫出平遠。平遠牛場花苗與之合。遂入黔西腹地。肆焚掠。騎賊慄疾。一日夜行三百里。至沙窩。將襲黔西城。嶽昭遣總兵沈茂勝等扼仁懷要隘。鄒復勝堵

牛場花苗自督總兵吳安康等迎戰連敗之楊店羊場狗
場羣匪懾楚軍威併聚龍安壘爲石壘拒我圍三日破其
壘匪奔三重堰道員林肇元等伏起擒魏洪發黃洪順獲
馬三百餘三月吳安康等乘勝攻蔡板苗砦克之擒汪草
登等駢戮之黔西肅清魏洪發黃洪順自咸豐五年倡亂
歷十有三載僭號王侯攻掠城堡不可勝數及其誅遠近
稱快四月安平匪掠清鎮遣謝景春擊走之六月雲南布
政使岑毓英攻克猪拱箐猪拱箐者隸畢節毘連滇之鎮
雄蜀之敘永山廣數十里峭壁千尋僅一面可通徑五年

冬其苗犯鎮雄勞崇光以其毒害三省遣毓英率大兵討
之毓英圍猪拱箐半載毀柵壘逾百遂逼山巔而壘劉嶽
昭策匪巢垂克乃攻平遠花苗杜外援滇軍番休迭擊苗
酋陶新春張黃蓋督萬人傾巢出戰圍營多陷毓英親率
楊玉科陷陣截賊數段擲火箭燒其柵會天雨退軍越日
束草填濠毓英揮戈先登諸將士從之羣苗驚潰陣斃及
墜巖澗者萬餘乃使土目呼曰降者免死眾皆棄械乞命
遂克猪拱箐擒僞元帥陶新春及黨魁四人賊目三百餘
人悍賊千二百人皆梟誅拔難民五千餘悉給資安插猪

拱箐既平三省邊患始稍紓矣七月嶽昭軍攻平遠苗進圍牛場破其月城滇軍攻海馬姑苗大破之是時勞崇光薨張凱嵩爲雲貴總督未至以臬司宋延春暫權之而迤西寇急嶽昭奏令毓英回師曲靖

朝旨亦促嶽昭赴滇嶽昭益督諸軍攻牛場九月克之擊定南關苗於河許盡殲其眾白泥苗反正於時貴西漸靖嶽昭率楚師赴滇曾壁光爲貴州巡撫貴東援軍三萬歲糜餉二百萬久出無功湖南巡撫劉峴疏劾兆琛身任黔藩鎮遠失守不審機宜周洪印駐軍沅州賊至移屯託口

賊退託口復回沅州取巧避兵曾不知恥請免兆琛官議洪印罪遣散所部酌留三營屯防布政使銜李元度攻荆竹園曠日無功先奪一階而更薦席寶田募萬人援貴東駱秉章亦言兆琛等勦辦一年無成效薦席寶田王永章成大吉各募勇五千

詔皆報可又以劉嶽昭赴滇飭川軍出遵義援應貴陽十月寶田軍至沅州十一月天柱苗出攻會同寶田部將席啟庚戰死李元度聞寶田至則急攻荆竹園破旁砦二十五水師破旁砦七益作壘逼之十二月寶田進軍石阡與

元度察地形寶田曰若據北岡荆竹園可破也元度依其法作二壘寶田列陣待戰號匪來爭攻元度新壘席軍遽退新壘潰明日寶田獨率軍屯新壘匪復來攻奮擊走之既得北岡砦匪無固志矣

七年正月元度寶田圍荆竹園分攻東西卡將士薄門爭柵元度部將黃元果先登遂克荆竹園黃號白號及石黨俘斬略盡用兵踰一年而後有此大捷諸將人人自奮苗教聞風瓦解於是元度進屯偏刀寶田進轎頂破三十六砦撫定者百有十收民口二萬八千二月苗酋張秀眉犯

晃州三月犯沅州麻陽寶田還軍要擊於麻陽其部將榮維善要擊於沅州皆大破之苗前以深入疾歸疲我諸援軍恐其擾善地不敢過故累得志至是始大創終不復東犯矣寶田已擊破苗眾麻陽則泝沅水西上四月還至黔連克苗砦四駐軍砦頭作大壘以攻台拱羣苗大恐十二酋爭作壘相保四川援軍至偏刀與李元度會師降七十人四月克偏刀元度告歸汰其軍爲三千人悉隸席寶田寶田以繼母喪歸榮維善暫領其軍事未幾仍起督軍黃平麻哈清平苗援台拱合攻砦頭守軍拒破之五月江

口苗繞攻清谿六月攻荆竹園七月攻上河皆爲守軍所
敗苗之來也其戰恆依險塞官軍勝則猱升兔脫慄急不
可捕捉或閉壘自守則散佚四出益焚掠無所忌寶田議
曰今苗之强者無踰台拱右鎮遠而左清江爲之兩翼兩
城不克卽台拱不可得不通砦頭左右卽兩城不能克台
拱克則羣苗解體矣宜增兵處處爲防而後可以言戰乃
上書劉崐請益萬人崐從其議以黃潤昌爲大將鄧子垣
副之領萬人出晃州北路而令寶田專南路寶田乃誠榮
維善用雕斲法行不持帷帳居不依城砦因敵糧宿敵壘

維善率所部轉戰山谷間懸軍五日苗偵者率莫測所嚮
或越大砦攻小砦或已過復還時十一月大雪軍中亦不
知維善所在遂屠七砦撫四砦砦頭南路平乃謀北通鎮
遠攻抱金破七砦西通桐柏油苗破之十二月克稿繞於
是砦頭北至鎮遠八十里苗砦皆空黃潤昌聞之馳至思
州攻鎮遠鎮遠城分府衛然久圯守城苗無固志潤昌至
克之戈鑑軍移駐清江清江有大苗砦二曰公鵝曰董敖
雍正中鄂爾泰用二萬人圍董敖不下撫之而還羣苗恆
以自恃

八年二月，榮維善引軍渡沅，先越山攻董敖，破之，還攻公鵝，又破之。諸苗下者七十八，遂克清江廳城。施秉苗聞風震懼，乘勝襲其旁砦，收施秉，進克餘慶。四川援軍已至黃坪，兩軍相距才六十里。於是黃潤昌、鄧子垣促維善會師，合萬八千餘人，自施秉進攻白洗、饗谷，皆下之。維善以軍久疲，請休士裹糧。潤昌意在急戰，維善不得已，率師先發。度黃飄山行者，頂趾相接。苗憑山拋石，維善揮將士疾行出險。潤昌軍創見，則以爲已陷伏，爭道相擠。苗乘之，軍大潰，自相踐而下。潤昌、子垣俱死。維善初遣蘇元春往援，亦

敗退。已聞潤昌等戰歿，乃大憤怒，率親兵二百入求其尸。袒衣持刀，戰良久。苗圍之數匝，乃退保一山。苗來益眾，急起潰圍出，反攻山間苗砦，破之，得其飯以果腹。復出縱擊，終不得脫。苗列炬夜守之，三晝夜。維善與二百人俱死。其先走者皆無恙。鎮遠敗聞，湖南大震。而苗方幸休息，終不入犯。四月，寶田親攻稿米，夜行五十里，徐啟瑞戰不力，立斬之。軍懼，卽破其砦，遣軍分守鎮遠及施秉。寶田仍還砦頭，時擒匪平。

詔李鴻章移師討貴東，會有天津事不果來。論者頗言寶

田軍行皆兆琛所至。易將已二載，師仍無效。爭欲罷其軍。而劉崐獨謂寶田可任，更增兵萬人，以張自牧司轉餉。奏言苗巢深阻，進兵宜分三路：一從清江徑指台拱，一從砦頭進攻施秉城，取施洞，一從施秉渡沅水。

上可其奏。五月，黎平苗攻屯營，龔繼昌、黃元果合拒之。六月，進攻廖洞、冰洞。七月，刈其禾。九月，始達施洞。十月，苗犯鎮遠，鄧善燮自清谿赴之，苗引去。龔繼昌等攻抱巖、九砦、克之。思州苗出攻州城，蘇元春敗之。高浪是年興義回匪犯普安，劉嶽昭遣軍擊走之。

九年三月，大合軍攻施洞。苗遏洞口，礮還自炸，乃走九股河，追之至白土。施洞既克，南北軍哨旗相望，乃進施秉，破其七砦。白洗苗來援，寶田親督大軍破之。會四川檄還援軍，月助餉五萬，俾貴州自募兵。湖南軍將益專任苗事。八月，龔繼昌定施洞北岸諸砦，寶田銳意攻台拱。台拱苗砦以百數，革夷最大。十月，寶田先改革夷旁三砦，克之。進破革夷薄台拱廳城，苗棄城遁。遂克台拱，進軍九股河。九股黑苗者，自楊應龍以來，頻拒大軍，皆以深阻約降而退。官軍未嘗入其境。寶田初議滅之，已乃分別勦撫。寶田用兵

三月平苗砦二百一十雞講丹江苗皆請歸化。

十年四月進軍凱里。凱里者台拱夙倚爲援者也。聞台拱破則收餘眾使居全洞。全洞凱里雖嶄絕官軍經百戰破砦以千數殊以爲易取。寶田以用兵久湖南疲於供餉欲必破凱里而罷兵。悉召諸將勉之。期旦日破苗而會食。比戰寶田親鼓之。官軍火鎗仰攻。苗拋石下擊。死傷枕藉。久不下。乃令諸將更食迭戰。唐本有者於席軍未知名。聞其部將死奮起攀砦垣以登。諸軍仰視呼譟從之。苗驚潰踰砦跳走。顛仆踐死者無數。旣克凱里全洞從而潰。得官印

以百計。遂乘兵威悉脅收旁近二百餘砦。還軍施洞沅水南北岸。乾隆中所設六廳城皆復。進麻哈定黃平。苗事略定。張秀眉遷保雷公山。官軍逼之。燒其壘。跳五月。下苗砦十二。軍益西進。八月。苗襲雷公山。要擊走之。苗悉眾保黃茅。十月。龔繼昌攻黃茅。克之。得其糧以供軍。張秀眉益不振。是時劉峴罷。王文韶爲湖南巡撫。益促援軍破賊。龔繼昌戈鑑徇丹江而北。破囊猛三砦。旁近砦盡下之。進攻報德。克其七砦。乃進囊德。連日雨雪。層冰結巖際。仰攻甚苦。繼昌募死士攀峭壁下。蘇元章繞出後嶺。苗驚潰。墜巖死。

者無數乘勝下烏溜等二十餘砦悍苗俘斬殆盡

十一年正月援軍分三路趨開懷二月克之殘苗走息滅
阿彌舍糾黨犯我營拒破之張秀眉走烏鴉坡時鄧善燮
吳自發等已破清水北苗砦唐本有謝蘭階蘇元春循清
水而南三月克香爐山兩盆河燬平茶五大寨於是凱里
以北悉定惟烏鴉坡未破耳烏鴉坡者岡巒綿亘二十里
鄂爾泰昔由八寨取丹江歎其險要因駐師焉張秀眉知
勢已衰糾楊大六潘老冒九大白姜老拉巖大五包大肚
金大五等麇集烏鴉坡連砦數十全黔叛苗盡萃其中王

文韶策羣苗鋌聚絕地勢將致死飛檄諸將和衷會戰以
圖聚殲於是唐本有謝蘭階由凱里進攻烏鴉坡西北約
黔軍駐丹溪扼其西南龔繼昌蘇元春由東南徑攻張秀
眉砦戈鑑由烏溜前進與龔繼昌相犄角羣酋見長圍已
合率死黨拒戰我軍頗傷亡而士氣彌厲唐本有乘夜襲
破其卡燒苗棚千計苗亦自焚其棚退踞牙塘唐本有等
躡之悉奪牙塘烏遂猴子坳苗砦投械乞撫者六萬餘人
時龔繼昌蘇元春已破張秀眉砦戈鑑已破楊大六砦殘
苗聚保烏堡冷水溝將北走以春水盛漲不能渡黔軍復

滇軍言 卷一四
截之河干。繼昌元春揮軍馳之。截賊爲兩。斬數千人。降萬人。會天大雨。張秀眉九大白乘雨出走。繼昌戈鑑追之。至挂燈。斬九大白。揭其首於竿。苗見之。羅跪乞降者二萬餘人。是役自丙申至壬子。鏖戰十七日。烏鴉坡二十里。苗皆悉平。留蘇元春駐其地。撫降眾。四月甲寅朔。龔繼昌自南刀進雷公坪。搜捕餘黨。殪巖大五於陣。己未。擒姜老拉。訶知張秀眉楊大六猶伏烏東山。繼昌親搜之。苗黨四五百人。持短刀殊死戰。戰良久。張秀眉楊大六仆地就擒。復獲金大五於白水洞。檻送長沙梟誅。其他苗教各酋。或俘或

斬無一脫者。是月。劉嶽昭遣軍擊破興義回匪。遂克興義。貴州平。王文韶繪圖以進。奏言。苗疆山川阻深。其形勢道里。雖土人難以悉數。苗民躡捷剽悍。專以劫殺爲事。固其性俗使然。亦緣憑恃險阻。勢難窮其所往。故叛服不常。久以化外羈之。我

朝雍正年間。始闢苗疆。創建六城。曰古州。曰台拱。曰清江。曰都江。曰丹江。曰八寨。謂之新疆。分設鎮協營汛。及同知通判等官。以資控制。乾隆二年。增建凱里。雞講。朗洞。柳羅。各城。佈置益密。新疆地界。跨鎮遠。黎平。都勻。三府之間。奧

衍蟠曲苗民孳息其中丁口約五六十萬。望寨星羅幾無隙地。自咸豐五年倡亂。六城所屬之苗先後叛逆。新疆全境陷沒。蔓延日久。黎平鎮遠都勻及所屬各城。汎悉遭蹂躪。而湖南西陲受害尤極。同治五六年。各前撫臣奏調席寶田統軍。大舉援黔。先平荆竹園轎頂山教匪。以絕其黨。援遂克江口。望若頭苗巢。駐師四出。雕剿鑿險。縋幽復城。克寨。竭七年之力。仰賴

朝廷威德。幸告成功。所有新疆六城。均由楚軍規復。苗疆千餘里。及蔓延處所。均已一律盪平。現在所存受撫苗民。丁口不過數萬。自古今以來。苗疆構禍連兵。至斯極矣。歷年楚師所至。深入窮搜。類多漢人足跡所未到。前經飭令統軍各將。就積年勦辦扼塞要害之處。繪圖呈核。以便隨時調度。規畫既久。苗疆形勢頗可指數。遂就各軍所呈。以鄂爾泰新闢苗疆爲斷。合爲總圖。凡楚軍所復之地。黏簽註明。其都勻麻哈清平黃平各邊境。爲川黔軍所克之處。不能盡悉年月。概未加簽。臣惟經理疆域圖籍。是資形勢險夷。必考前轍。謹繪圖咨呈軍機處。用備考核。於是湖南援黔諸軍皆罷。留防軍五千屯沅西。苗或蠢動不爲害。

王定安曰。貴州之亂。始咸豐四年。訖同治十一年。歷十有九載。比於東南諸行省。蹂躪最久。貴陽之不亡者。幸矣。巡撫困守孤城。號令不出百里。日以呼籲乞援爲盡職。其中苗教號楨回狎之屬。其名不可勝紀。而郡縣旋復旋失。其日月難考。吾就楚軍戰績之所在者。摭而錄之。古稱蠻夷之人。其性慌忽。如黔苗者。所謂先叛後服者耶。然劉嶽昭席寶田之功。與鄂爾泰張廣泗比隆矣。

湘軍記卷十四

武昌范德培校字

